

L mestier di genitores

La Consulta de la Families de Fascia endreza na lingia de scontrèdes col dotor Degasperi per rejonèr del raport anter fies e genitores



L raport anter genitores e fies é de spes rich de problemes.

Sozietà - L sistem mior per prevegnir e smendrer l padiment de l'om l'é chel de ge sporjer ai bec na joeneza serena ge dajan comprenjon e segurezza ma chest l'é possibol demò te families ledies da tenjions e che no les vegn lascèdes soules canche les se troa a confront con vèlch problem.

Dachelanvia, vedù enche la gran partezipazion a la scontrèdes de l'an passà, i Assessorac ai Servijes Sozièi di Comuns de Fascia, aldò de la proponeta de la Consulta de la Families, col contribut del Servije politiches sozièles de la Provinzia de Trent e la colaborazion de l'Istitut Comprensif Ladin, à pissà de endrezèr n'autra lingia de scontrèdes formatives dal titol "Projet Genitores - An 2009" col dotor psico-pedagogist Paolo Degasperi.

L prum encounter de chest secondo zicl formatif sarà en

mércol ai 7 de otober da les 20.30 te la sala grana de la scoles mesènes de Poza dal titol "Se destachèr dai genitores: chi padescel de più?". Sul troi de la vita, de spes i fies se troa a cogner se destachèr dai genitores. L'é spartijons che porta ben segur padiment da pèrt di fies e enche di genitores, ma che serf per doventèr persones responsàboles.

La seconda scontrèda sarà en mèrcol ai 21 de otober e vegnarà rejonà dintornvia l tem "L'é enche l papà". De spes se à l'imprescion che i pères no saesse assà de l'emportanza de so ruol e per chest i ge lascia a la mèr l'educazion di fies per dapò entervegnir canche oramai l'é massa tèrt o n muie più senester.

L terz encounter sarà en mèrcol ai 4 de november su l'argoment "L'agressività del bez: él n ben o n mèl?". La violenza del bez no cogn vegnir veduda demò desche

n problem, ma enche desche na ressorsa percheche la pel ge esser de ütöl per crescer e se afermèr te la vita. Ge vel aboncont la educèr percheche no la dovente n empediment a la sozialisazion e al benesser del bez e de chi che ge stès apede.

La quarta scontrèda sarà en mèrcol ai 18 de november dal titol "Buli e vitimes: che él pa da fèr?"

Buli e vitimes l'é bec e joegn che con cerc comportamenc, soraldut te l'ambient de la scola, met al luster so dejèje. I buli en particulèr ge vel i didèr, co na cordanza anter scola e familia, a troèr mesi più adaté per afermèr sia personalità.

L'ultima scontrèda del secondo zicl sarà en mèrcol ai 25 de november da les 17.00 su l'argoment "L mestier di giaves". I giaves l'é na gran ressorsa te noscia sozietà che veit n muie de femenes che laora e pecia coes per i picoi. I pel aboncont doventèr enche n problem canche i met ite massa l nès te l'educazion di nevoes, se troan a outes en concorenza coi genitores.

L'obietif finèl de chest percors formatif l'é chel de didèr i genitores a se orientèr te so senester mestier de educatores, ma enche chel de formèr n grop de genitores che saesse se autogestir e se empegne a favor de na genitorialità semper più responsàbola.

Per maor informazions se pel chiamèr la referenta del projet Maria Cristina Rizzardi al numer de telefon 348.0546930 opura scriver a consulta@famiglie.info. (mci)